



Gabinete Wever - Croes II



# ISLAONLINE

Noticia di Gobierno

2023

Diamars 6 Juni 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





## BISHITA DI 'THE HAT LADIES' DI CORSOU CERCA PRIME MINISTER



Diabierna 2 di juni, Prome Minister Evelyn Wever-Croes a ricibi bishita di cortesia sumamente ameno di un grupo di dama di nos Isla Ruman Corsou, 'The Hat Ladies'. Bisti hopi elegante y cu sombrenan colorido y hopi bunita, e damanan aki a bishita Prome Minister na unda a intercambia informacionnan riba diferente tema di hende muhe cu e islanan tin en comun. Pero principalmente e damanan a bin gradici Prome Minister, como un hende muhe, pa e trabou cu e ta haciendo pa Aruba.

'The Hat Ladies' ta un grupo social di profesionnan cu ta haci, cu hopi amor, diferente obra caritativo pa nos pa e comunidad di Corsou. E grupo aki ta consistiendo di damanan for di diferente isla di ex-Antia. Y tambe nan ta pone damanan den comunidad den funcionnan prominente, den lus positivo. Probechando cu 'The Hat Ladies' tawata na Aruba durante fin

di siman cu a pasa, nan a desea di haci bishita cerca Prome Minister y Minister di Finanzas durante nan bishita na Aruba.

'The Hat Ladies' ta consisti di e siguiente damanan: Edna Carlo, Mariska Celestina-Willems, Angelique Fredema-Wallé, Suzanne Kwas, Sharine Mauricio, Sharine Mauricio-Hersilia, Herta Parabirsing-Balentina, Nidia Rosaria-Wallé, Lidia Sillé-Gomez, Marilyn Wallé de Alcalá, Ishel Wijngaarde.

E damanan a regala Prome Minister un buki titula 'E cilindro magico entre Aruba y Curaçao' y algun artesanía unico. Prome Minister ta gradici 'The Hat Ladies' pa nan bishita y pa e conbersacionnan hopi ameno y pa e bunita recuerdo cu nan a laga atras.



# **Prome Minister Evelyn Wever-Croes:** **Durante e prome edicion di Periodista Pa Un Dia,** **5 MUCHA DI SCOL BASICO A CONOCE DI CERCA** **E TRABOU VALIOSO DI TA UN PERIODISTA** **Pa motibo di e interes y demanda pa cu Periodista Pa Un Dia,** **inscripcion a cera**

Diabierna ultimo, a tuma luga e prome edicion di Periodista Pa Un Dia den e di dos edicion di Conferencia Hubenil. Periodista Pa Un Dia ta un proyecto cu a cuminsa na 2021, y mirando e exito y interes di e muchanan pa cu e proyecto aki, Gobierno a dicidi di continua esaki e aña aki tambe.

Prome Minister Evelyn Wever-Croes a splica cu e meta di e proyecto aki, ta pa nos muchanan, cu ta nos futuro generacion, siña conoce mas di cerca e carera importante di periodismo. Ta hopi importante pa un pais tin bon periodistanan ya cu ta nan ta mantene comunidad informa di tur acontecimento. P'esey ta sumamente importante pa cuminsa inculca den e muchanan e importancia di e carera aki.

E proyecto aki ta organisa pa Ministerio di Asuntonan General, y mirando cu Dia di Prensa ta na caminda, a scoge pa haci esaki den e luna di juni na unda cu tur diabierna, 5 mucha di scol basico ta invita na Bestuurskantoor pa bin haci nan preguntanan na Prome Minister. Na yegada e muchanan ta wordo prepara pa un periodista y e team di PR di Gobierno. Diabierna ultimo a toca turno na e periodista conoci Andrew Vrolijk di TeleAruba pa prepara e muchanan na nan yegada.

Prome Minister a indica cu durante e sesion di pregunta a resalta cu e muchanan tin hopi interes den gobernacion. E muchanan a bin bon prepara y nan preguntanan tabata hopi interesante. "Sigur un atardi hopi ameno na unda e muchanan a siña hopi di loke ta e trabou valioso di ta un periodista, y lo mas importante ta cu nan a bay super contento," Prome Minister a expresa.

Prome Minister ta gradici tur e muchanan cu a participa den e prome edicion di Periodista Pa Un Dia, na e mayornan pa tuma e tempo pa trece nan yiu bestuurskantoor, y e scolnan cu ta encurasha e muchanan pa registra y participa na proyectonan importante asina.

Prome Minister ta gradici tur mayor cu a permiti nan yiunan participa. Pa motibo di e interes y demanda pa cu Periodista Pa Un Dia, inscripcion a cera. Muchanan cu no ta participa, por wak Periodista Pa Un Dia via TeleAruba y riba pagina di Facebook di Gabinete Wever-Croes.







# RESUMEN DI SIMAN

Asuntonan General,  
Innovacion,  
Organisacion Gubernamental,  
Infraestructura y  
Planificacion Teritorial

**PROME MINISTER, EVELYN WEVER-CROES**

**27 mei - 2 juni 2023**

## Inicio Weganan Escolar 2023

Recientemente a tuma luga e ceremonia oficial di inicio di Weganan Escolar (WE) 2023. Prome Minister Evelyn Wever - Croes kende tabatin e honor di saca e prome bala conhuntamente cu Minister Endy Croes y Presidente di Parlamento Edgar Vrolijk a desea tur cu ta participa exito. Danki na Minister Endy Croes pa su compromiso y determinacion pa continuacion di e evento.



## Jaarverslag CEDEHM

CEDEHM a presenta su Jaarverslag 2022, den cual a relata e actividad nan cu a wordo haci den cuadro di empoderamento y proteccion di hende muher. Prome Minister a gradici Centro di Desaroyo di Hende Muher - CEDEHM pa e trabou grandi cu nan ta haci.



## Fiesta Tipico den Bario

Prome Minister a bishita Centro di Bario Savaneta pa celebra e di tres 'Fiesta Tipico den Bario' organisa pa Fundacion Union di Tipiconan Rubiano. Na e ocasion a reconoce dos persona, sra. Mathilde Paskel Boekhoudt y sr. Estaban Koolman) pa nan contribucion y sosten na Aruba su cultura.





Asuntonan General,  
Innovacion,  
Organisacion Gubernamental,  
Infraestructura y  
Planificacion Teritorial  
PROME MINISTER, EVELYN WEVER-CROES



### Bishita na Stichting HUNTO

Prome Minister conhuntamente cu colega Minister Rocco Tjon a bishita Stichting HUNTO pa mira con e trabounan ta avansando. Stichting HUNTO lo yuda nos combati salud mental.



### Recepcion VNO despedida sr. Abrahams

Vertegenwoordiging van Nederland (VNO) in Oranjestad a despedi di sr. David Abrahams cu a traha na Aruba y a guia e organisacion e ultimo añanan. Prome Minister a asisti e recepcion conhuntamente cu colega Minister Dangui Oduber y President di Parlamento Edgard Vrolijk pa gradici sr. Abrahams pa e cooperacion.



### Reunion cu DWJZ

Reuni a tuma luga cu sr. George Croes director di Directie Wetgeving Juridische en Algemene Zaken (DWJZ). Pa trata aspectonan di legislacion pa e reformanan y cambionan cu kier implementa.



### Di dos edicion Periodista pa un Dia

E conexion cu dia di prensa Ministerio di Asuntonan General ta organisa e di dos edicion di 'Periodista pa un Dia'. Esaki ta un proyecto importante pa stimula nos muchanan pa un posibel profesion den periodismo. Pa mas informacion y tur detaye di con pa participa por bishita e pagina di Gabinete Wever - Croes riba Facebook.



### Entrega di Landsbesluit na empleadonan di KIA

E siman aki a tuma luga e clausura di e re-organizacion di KIA. Prome Minister Evelyn Wever-Croes hunto cu Minister Rocco Tjon tabata presente na e gran evento aki na unda a entrega e landsbesluit na tur e 170 personal di Korrectie Instituut Aruba (KIA). E reorganizacion aki a cuminsa na aña 2009 y awe, 13 aña despues a logra finalis'e. Esaki sigur no lo tabata posibel sin e determinacion di e actual Minister di Husticia Rocco Tjon cu hunto cu e team di trahadonan, Directiva di KIA, sindicatonan y Departamento di Recurso Humano a dedica na finalisa e proyecto aki.



# Prome Minister Evelyn Wever-Croes: **PROME MINISTER A PRESENCIA UN BUNITA PRESENTACION NA E 'CULTURELE KUNSTZINNIGE VORMING DAG (CKV)' DI MARIA COLLEGE NA CAS DI CULTURA**



Diamars mainta, Prome Minister Evelyn Wever-Croes tawata presente na Cas di Cultura na unda cu Maria College a organisa e Culturele Kunstzinnige Vorming Dag (CKV) caminda cada klas a presenta resultado di trabounan practico di henter e aña. E show a cuminsa na un manera hopi imprecionante cu algun hoben alumno y ex alumno di Maria College y tambe docentenan cu a duna un bunita show pa e alumnonan. Alumnonan a presenta baile y canto brindando un mainta hopi ameno y bunita.

Prome Minister ta felicita Maria College cu presentacion aki expresando cu e talento aki cu nan ta saca den tur e muchanan lo yuda nan den nan futuro. Nan ta haya un forsa hopi mas grandi pa nan por logra tur nan metanan pero specialmente e talento cu nan ta comparti ta increiblemente grandi. Den su discurso e mainta aki, Prome Minister a encurasha tur e alumnonan pa bay pa nan meta.

“Pabien na Maria College, Cabezante señora Rozenstand y tur alumno. Ohala cu esaki por yuda cada alumno tambe den tur paso cu nan mester tuma den futuro. Pabien alumnonan. Propone boso meta y bay p’e. Aruba mester di cada un di boso pa hiba nos pais padilanti. Nos ta aplaudi boso pa tur loke boso a logra”, Prome Minister a expresa.







## PAHO CU DOS DIA DI WORKSHOPS DEN CUADRO DI SALUD MENTAL

Segun Minister di Husticia y Asuntonan Social sr. Rocco Tjon, salud mental ta hopi importante pa Gabinete Wever-Croes, pa e motibo ey diferente proyecto a wordo ehecuta den cuadro di esaki. Un di e proyectonan cu a demostra su balor agrega, tawata e eliminacion di e lista di espera pa loke ta e cuido di salud mental pa adulto y muchanan cu tin mester di esaki. Hunto cu PAHO, a percursa pa diseña un roadmap caminda te cu 2023 lo duna atencion na e diferente aspectonan pa cu esaki, y como parti di esaki, a organisa dos dia di workshops pa e cadena di enseñansa y cuido, den cuadro di salud mental.

Manera ta conoci, e stuurgroep GGZ cual ta consisti di tur stakeholders, ta reuni cada dos siman y ta atende cu aspectonan cu ta toca e parti di legislacion, cuido specifico cu mester wordo brinda, maneho, pero tambe e parti di financiamiento y inversionnan cu ta necesario den tur nos profesionalnan. Algun siman atras, 12 persona a gradua como mental health professional, y di e forma aki ta percursa pa e cuido bira mucho mas accesibel, pa tur esnan cu tin mester di esaki.

Un proyecto hopi bunita a inicia diasabra ulitmo, caminda profesionalnan cu ta traha den e sector di cuido a haya diferente tools pa señala y identifica ora un persona ta sufri di salud mental, pa asina e persona ey por haya ayudo mucho mas lihe. Dialuna y Diamars e mesun curso a wordo brinda na henter e veld di enseñansa y fin di luna un otro curso lo wordo brinda na tur esnan cu ta traha den e cadena hudicial. Di e forma aki, mas y mas, ta percursa pa aloca fondonan necesario pa por atende cu e tematica di salud mental.

Por ultimo minister Tjon a expresa di ta sumamente satisfecho, y ta gradici PAHO cu a asisti cu e proyecto aki, y a brinda e workshopnan. Tambe, palabranan di pabien y gratitud na tur esnan cu a asisti e workshopnan aki, y nos ta spera cu di e forma aki nan por tin mas tools pa por eherce nan trabou mas miho. E feedback di esnan cu a participa na e workshopnan aki tawata hopi positivo, y a indica cu esaki ta di balor agrega, y pa e motibo aki lo sigui inverti den e forma aki pa asina por duna nos profesionalnan mas y mas tools.







# PRONTO LO PREPARA NOS STUDIANTENAN NA NECESIDAD DI MERCADO LABORAL

**Cu proyecto PEL, ta bay percura pa mercado laboral tin empleado di calidad**



Recientemente, Minister di Enseñansa y Deporte Endy Croes a reuni cu DEA, kende ta representante di Ministerio di Enseñansa, DAO, DPL y Enseñansa pa Empleo, cu ta representa Ministerio di Labor y ATIA, AHATA, SNBA, y KVK, cu ta representa Sector Priva. Durante e reunion a trata e proyecto di PEL, Plataforma Enseñansa y Labor, cual ta un di e recomendacionnan di Doorlichting Rapport van het Arubaanse Onderwijsbestel. E meta principal di e proyecto aki ta pa educa e studiantenan na e necesidad di mercado.

Un tremendo proyecto, unda cu experto di Enseñansa, Labor y Sector Priva a bin hunto pa investiga e necesidadnan cu tin riba mercado laboral y basa riba e resultado ta evalua ki tipo di enseñansa mester y na ki nivel pa prepara nos hobennan y futuro empleadonan na necesidad cu mercado ta existi. Den e proyecto aki ta traha riba diferente tema, entre otro, necesidad di mercado, ahustacion di curiculo a base di necesidad, pasantia, examen y preparacion pa mercado laboral. Durante e reunion a duna mandatario di Enseñansa un presentacion amplio di e ultimo



desaroyonan di e proyecto. Finalmente, Minister Endy Croes ta indica cu unabes e proyecto ta completamente forma, ta bay cuminsa prepara nos studiantenan conforme necesidad di mercado laboral. Pa asina percura pa mercado laboral por tin empleado di calidad, manera cu e necesidad ta existi.



# MINISTER ENDY CROES TA FELICITA E SCOLNAN CU A DESTACA DEN BASKETBALL B MUCHA HOMBER

**Aruba ta keda cordialmente invita pa e gran clausura di Weganan  
Escolar dia 9 y 10 di juni proximo**



Dialuna merdia, e competencia di Weganan Escolar 2023 a continua den e disciplina di Basketball B Mucha Homber na YMCA San Nicolas. Colegio San Hose y Colegio Sagrado Curason a bataya pa conquista e prome luga di Basketball B Mucha Homber di Weganan Escolar 2023. Colegio Sagrado Curason ta gana e partido cu e score di 7-3 y asina titula campeon di Weganan Escolar 2023. Scol Basico Washington y Sint Paulus School a hunga pa di tres y cuater luga. Den un wega hopi cera Sint Paulus School a gana cu e score cu di 4-3.

Minister Endy Croes ta felicita e scolnan cu participa den basketball y ta desea tur alumno cu ta competiendo den diferente disciplina durante e dianan binidero hopi exito. Concluyendo, Mandatario di Deporte, ta invita e comunidad di Aruba pa e gran clausura di Weganan Escolar, diabierna 9 di juni, cuminsando 5:30 di atardi na Joe Laveist Sport Park na San Nicolas, unda cu ta bay tin entregamento di premio pa e scolnan ganado, show di baile y entretenimento di Groove Masters.



Diasabra, dia 10 di juni ta tuma luga e Competencia di Baile Deportivo y Cultural na Aruba Entertainment Center na Dakota, cuminsando 5:00 di atardi cu show cultural, dies (10) scol ta competiendo den baile cultural y moderno, tambe lo tin diferente tent di cuminda crioyo y artesanía y banda Ritmo Real ta cera Weganan Escolar 2023.



# MINISTER ENDY CROES A RICIBI PRESENTACION DI E TRABOU CU TELEFON PA HUBENTUD TA EHERECE PA NOS HOBENNAN



Siman pasa, Minister Endy Croes a reuni cu representantenan di Telefon Pa Hubentud. Presente na e reunion tabata director di Telefon Pa Hubentud Sr. James Sneek y miembro di directiva Sra. Jeanine Tromp. Mandatario di Enseñansa a ricibi un presentacion hopi amplio di e trabou cu Telefon Pa Hubentud ta eherce pa comunidad di Aruba specialmente pa nos hobennan. Sr. Sneek a indica cu tin 148 pais cu tin un liña di telefon pa hoben, bou di number ta 174, e ta conoci internacionalmente como e Child Helpline International. Na Aruba nos ta uza e number 131.

Dia 20 di november 1999, a lansa Telefon Pa Hubentud como un instancia caritativo independiente, cu e number 131 dirigi riba mucha y hoben di 8 pa 24 aña. Telefon Pa Hubentud ta duna servicio di dos or pa seis or di atardi 365 dia pa aña. E yamadan ta anonimo, confidencial y gratis. Na 2014, Telefon Pa Hubentud a lansa un app cu e hobennan por haci uzo di dje, entre otro, pa busca informacion. Telefon Pa Hubentud tin un total di diesdos (12) "samenwerkings" protocol firma cu

diferente instancia na Aruba. Tambe, Telefon Pa Hubentud ta duna asistencia na Saba y Sint Eustatius.

Telefon Pa Hubentud ta conta cu 38 boluntario. E directiva di Telefon Pa Hubentud ta consisti di cinco miembro boluntario cu ta na encargo di planificacion di e fundacion. E staf ta consisti di tres persona, un director y dos trahado social.

Sr. Sneek a splica cu Fundacion Pa Hubentud tin un relacion hopi cerca cu scolnan na Aruba. Tur dia Telefon Pa Hubentud ta duna charla, tayer, lectura y proyecto tocante e topiconan manera, termento, divorcio y sexualidad. Telefon Pa Hubentud ta alcanza alrededor di 9000 persona pa aña. Por ultimo, Sr. Sneek a indica di algun necesidad cu Telefon Pa Hubentud tin y Minister Endy Croes a priminti di sondea e posibilidad pa por cumpli cu cierto necesidadnan. Mandatario di Enseñansa ta gradici Telefon Pa Hubentud pa e bunita trabou cunan ta eherce pa comunidad di Aruba, specialmente pa nos hobennan.



# DELEGACION DI STATEN A BISHITA ARUBAHUIS



Un delegacion di Staten di Aruba a haci un bishita na Arubahuis na final di e reunionnan di IPKO.

Na Arubahuis e delegacion a wordo ricibi pa Minister Plenipotenciario mr. Ady Thijsen, director a.i. drs. Glenda Hernandez y personal di Arubahuis.

E delegacion a consisti di Presidente di Staten Edgard Vrolijk y parlamentarionan Shailiny Tromp-Lee, Marco Berlis, Ricky

Hoek, Hendrik Tevreden, Rõnd Santos do Nascimento y Micha Raymond.

Minister Thijsen a gradici e miembronan di Staten pa a acepta su invitacion pa bishita Arubahuis y asina por intercambia cu e personal riba e reunionnan di IPKO cu a tuma lugar e ultimo dianan na Den Haag entre e parlamentarionan di e cuater pais den Reino Hulandes.

Tuma contacto cu Info MinFIC



**+297 592-8200**

Nos tey pa contesta bo  
pregunta y ricibi bo sugerencia.



Gobierno di Aruba



Uni forsa y cu  
positivismo  
ta produci  
beneficianan grandi  
den diferente area pa  
famianan, politica,  
matrimonio, pais, etc  
Hunto nos ta uza e  
benificianan aki pa  
engrandece nos mes  
y Aruba.



2023

AÑA DI UNION Y POSITIVISMO!